

ኢብራዌ አሳሰ ጸፊቱዳ ኪታ ጊደ ቆፋ

ሃይሲ ሃ ኪታዚ ጸፊቱዳይ ኢሰታ ቦላ ጋኪዳ ጊታ ሜቶዛ ጋሶን ባ አማኖ ኣጋናሰ ማቲዳ አማኒዛ አሳ ጊሻሳ። ሃይሳ ጸፊዳይይ ኢብራዌፔ አማኒዳይታሰ ዩሱሰ ኪርሰቶሲ ቱማኔ ዉርሴላን ጸሲ አሳ ናሰ ቆንጨሲዳይ ጸሳ ናይ ኢዛ ጊዲዳይሳ ቤሳናሳ፤ ሃ አማኒዛይቲ ባ አማኖን ሚኒ ኤቃና ማላ ኢዚ ኢሰታ ሚንፊፊሰ፤ ሄሲካ ቱሙ ጊዲዳይሳ ሄዙ ቱማ ዮኦታ ቆንጨሲ ቤሴሰ።

1. ባ ኤኪዳ ሜቶዛ ባጋራ ባ አዋሰ ቱማፔ አዛዜቲዛዳ ጊዲዳ ጊሻሰ ካሴ ጋልኣ ጫቆ ማጻፋን ዲዛ ናቤታፔ፡ ሙሴፔኔ ኪታንቻታፔካ ኬሂ አጼሰ።
2. ዩሱሲ ካሴ ጋልኣ ጫቆ ዋዴ ቄሴታፔካ ኬሂ አጼዛ ሜርና ቄሴይ ኢዛ ጊዲዳይሳ ጸሲ ባ ዶናን ዮቲዴሰ።
3. አማኒዛዳይ ናጋራፔ፡ ባቦፔኔ ሃይቆፔ ዩሱሳ ባጋራ አታና፤ ዩሱሲ ቄሴታ ሃላቃ ጊዲዳ ማላ ኢብራዌታ አማኖ ዋጋቲኔ ማሄታ ያርሾይ ጮ ኤሾ ማላ ጊዲዳ አቶቴላይ ኢዚ ቱሙ ጊዳና ማላ ኦሊዴሰ።

ሃ ማጻፋ ጸፊዳይይ ኢሰራኤሌ ናይታ ታሪኬን ኤሬቲዳ አሳታ አማኖ ሌሚሶ ጎኤቲዲ (ሺምፖ 11) ናባቢዛ አሳይ አማኖን ሚናና ማላ ቆፍሴሰ። ሄሳሶካ (ሺምፖ 12) ቦላ ናባቢዛ አሳይ ባ አይፌ ዩሱሳ ቦላ ሎኤሊ ዋሊዲ አማኖን ሚናና ማላኔ አይ ሜቶይኔ ዋይይካ ኢሰታ ቦላ ጋኪኮካ ዳንዳያና ማላ ዞሬሰ። ዉርሴላንካ ኢዚ ኢሰታሰ ዲማ ዲማ ዞሬኔ ሴራ ቃላ ኢሞን ኩዩሰ።

ሃ ማጻፋይ ኦይኪዳ ኩሜላ ቆፋ

ጌሎሶ፤ ጸሲ ባና ኪርሰቶሳ ባጋራ ቆንጨሲዴሰ 1:1-3

ኪርሰቶሲ ኪታንቻታፔ ቦላ ጊዴሰ 1:4—2:18

ኪርሰቶሲ ሙሴፔኔ ኢያሶፔ ቦላቴሰ 3:1—4:13

ኪርሰቶሳ ቄሴቴሰ 4:14—7:28

ኪርሰቶሳ ጫቆ ቃላ ቦላቴሰ 8:1—9:22

ኪርሰቶሳ ያርሼቴላ ቦላቴሰ 9:23—10:39

አማኖ ባይራቴሰ 11:1—12:29

ጸሳ ኡፋይሶ 13:1-19

ዉርሴላ ዋሳ 13:20-21

ኩሻ ቆፋ 13:22-25

ባ ናዛ ባጋራ ጸሲ ዮቲዳ ቃላ

¹ ቤኒ ዋዴፔ ኦይኪዲ ጸሲ ዱማ ዱማ ኦጌራ ናቤታ ባጋራ ካሴ ኑ ኣዋታስ ዳሮ ዋዴ ዮቲዴስ።

² ቃሴ ሃይሳ ወርሴላ ዋዴ ቦላ ወርሲ ላቲሲዳዴኔ ሃ ኣላሜዛ ሜዲዳ ባ ናዛ ባጋራ ኑስ ዮቲዴስ።

³ ኢዚካ ጸሳ ቦንቾ ቤሲዛዴኔ ጸሳ ጸሳቴላስ ሎኦ ለሚሶ ጊዲዲ ባ ዋልቃማ ቃላን ወርሲካ ሺሺ ኦይኪዴስ፤ ኢዚ ኣሳ ናጋራፔ ጌሺዳፔ ጉዬ ሳሎን ቦንቾ ጸሳ ኡሻቻን ኡቲዴስ።

ኪታንቻታፔ ጸሳ ና ኣዴሐ

⁴ ሄሳ ጊሻስ ኢዛስ ኢሜቲዳ ሱንላይ ኪታንቻታ ሱንላፌ ኣዲዛይሳ ማላ ኢዚካ ኪታንቻታፔ ኬሂ ኣዴስ።

⁵ ጸሲ ኪታንቻፌ፥

«ኔኒ ታ ና፤

ታ ኔና ሃቾ ዩላዲስ።

ዋይኮ ታ ኢዛስ ኣዋ ጊዳና፤

ኢዚካ ታ ና ጊዳና»

ኦናስ ጊዴ?

⁶ ቃሴካ ጸሲ ባ ባይራ ናዛ ዱጌ ሃ ቢታ ቦላ ዩዲሼ፥ «ጸሳ ኪታንቻቲ ወሪካ ኢዛስ ጎይኔቶ» ጊዴስ።

⁷ ኪታንቻታ ጊሻስ ሃሳይሼ ቃሴ፥ «ኪታንቻታ ኣናናታ፤ ባ ኦሳንቻታካ ታማ ላጮ ኬሴስ» ጊዴስ።

⁸ ናዛ ጊሻስ ቃሴ፥ «ጎዶ! ኔ ዙፋኔይ ሜርናፔ ሜርና ጋካናስ ሚኒ ዳና፤ ኔኒ ኔ ካዋቴላ ሊኬ ካሌላሳ።

⁹ ኔኒ ጸሎቲሐ ዶሳዳሳ፤ ማካላካ ኢጸሳ፤ ሄሳ ጊሻስ ጸሲ ኔ ጎዳይ ኔና ኔ ላጌታፔ ቦላ ኬሲዴስ፤ ኔና ኡፋይሳ ዛይቲ ቲይዴስ» ጌስ።

¹⁰ ቃሴ፥ «ጎዶ! ኮይሮ ኔኒ ቢታ ሜዳዳሳ፤ ሳሎቲካ ኔ ኩሼን ኦሴቲዳ።

¹¹ ኢስቲ ዳያና፤ ኔኒ ጊዲኮ ሚና ዳና፤ ኢስቲ ወሪካ ማይኦ ማላ ጋልኣና።

¹² ኔኒ ኢስታ ማይኦ ማላ ቃላምኣና፤ ኢስቲካ ማይኦ ማላ ላሜታና፤ ኔ ጊዲኮ ኣይዴካ ኔኒ ኔና፤ ኔ ዱሳስ ወርሴሐ ዴና» ጌስ።

¹³ ጸሲ ኪታንቻታፔ፥ «ታኒ ኔ ሞርኬታ ኔ ቶሆ ጋርሳን ዩዲሳና ጋካናስ ኔ ታ ኡሻቻን ኡታ» ኦና ጊዴ?

14 ኪታንቻቲ ወሪካ አቶቴል ላታና አሳታ ኦላናሰ ጸሳፌ ኪቴቲዛ ኦሳንቻ አያና ጌዴቴኔ?

2

ጌታ ማርቴል

1 ሄሳ ጌሻሰ ኦኒ ሲዪዳ ቃላፔ ባሌቲዲ ኩንደንታ ማላ ኦ ሲዪዳ ቃላ ሎኤሊ ናጋናሰ ቤሴሰ።

2 አዛሰ ጌቦ ካሴ ኪታንቻታ ባጋራ ዮቴቲዳ ቃላይ ቱሙ ጌዲዳ ሄ ቃላ ዩጂ አጂዳይ ባሰ ቤሲዛ ቂጸቴ ኤኬሰ።

3 ኦ ቃሴ ሄሳ ማላ ጌታ ማርቴል ጮ ሌፒ ሂሰቲቦ ዋኒ አታኔ? ሃይሲ ማርቴል ኮይሮ ጎዳ ባጋራ ኦሰ ዮቴቲዳሰ፤ ኢዛፔ ሲዪዳይቲካ ኦሰ ጌሺ ዮቴዳ።

4 ጸሲ ቃሴካ ማላታታ፥ ማላሊሲዛ ሚሻታ፥ ዱማ ዱማ ማላታታ ኦሶኒኔ ባ ሼኔ ማላ ኢሚዳ ጺሎ አያና ኢሞታታ ባጋራ ኢሰታ ማርካቴላ ሚንሷዴሰ።

አሳ ዜሬል አሺዳይ ዩሱሳ

5 ጸሲ ሃይሳ ኦ ኢዛ ጌሻሰ ሃሳይዛ ቡሮ ያና አላሜዛ ኪታንቻሰ ሃሪሲቤና።

6 ጌዶ አቲን ጌሻ ማጸፋይ ሃራሶን፥

«ኔ ኢዛሰ ዩሻ ቆፓናሰ

አሲ አዜ?

ኢዛሰ ኔ ቆፓናሰ አሳ ናይ

ኢዚ አዜ?

7 ኔ ኢዛ ኪታንቻታፔ

ጉላራ ጉላዳሳ።

ቦንቾ ዛወዴኔ ጋላታ

ኢዛ ሁኤን ዋላዳሳ።

ኔኒ ኢዛ ኔ ኩሺ

ኦሶታ ቦላ ሹማዳሳ።

8 ኔ ወርሳካ ኢዛ ቶሆ

ጋርሳን ሃሪሳዳሳ፤

ጸሲ ኡባካ ኢዛፔ ጋርሳራ

ኢዛሰ ሃሪሲሺን

አቲዳይ አይ ሚሺካ ዴና።

ሃኢ ቃሴ

ወሪካ ኢዛሰ ሃሪቲሺን

ኦ ቤዩቤኮ» ጌዴሰ።

9 ጊደ አቲን ጸሳ ኪያቴላን አሳ ኡባ ጊሻሰ ሃይቃናሰ ኪታንቻታፔ ጉላ ዋዴ ጉጺዳ ዩሱሲ ዋዬ ሃይቆ ሃይቂዲ ሃኢ ቦንቸኔ ጋላታ ዛዉዴ ባ ሁኤን ዋሊዳይሳ ኑ ቤዮሰ።

10 ሃኒዛይ ወሪካ ኢዛፔ ኢዛሰ ሜጴቲዳ ጸሲ ዳሮ ናይታ ቦንቸሰ ኤፋናሰ ኢሰታ ማርቴላሰ ሁኤ ጊዲዳ ዩሱሲ ዋዬን ፖላናሰ ኮሺዛዝ ጊዲዴሰ።

11 አሰ ጌሺዛይኔ ኢዛን ጌይዛ አሳይ ሄይቲ ኢሲ ኬላ አሳታ። ሄሳ ጊሻሰ ዩሱሲ ኢሰታ፡ «ታ ኢሻቶ» ጊ ጴይጋናሰ ዩላቴና።

12 «ታኒ ኔ ሱንላን ታ ኢሻታሰ ዮታና ሺቂዳ ዴሬዛ ሲንላን ኔና ጋላቲዛ ማዛሙሬ ታ ዩጸና።»

13 ሄሳሶካ፡ «ታ ኢዛን አማኔታና» ቃሴካ፡ «ታኒኔ ታሰ ጸሲ አሚዳ ናይቲ ኑ ሃን ዶሰ» ጌሰ ጌሻ ማጸፋይ።

14 ናይታሰ አሾይኔ ሱሊ ዲዛ ማላ ኢዚካ ኢሰታ ማላ አሳ፤ ሄሲካ ሃይቆ ቦላ ኢዛሰ ዋልቃይ ዲዛ ዳቡሎሳ ኢዚ ባ ሃይቆ ዋልቃን ዛራናሳ።

15 ሄሳሶካ ባ ዲዛ ዋዴ ኡባን ሃይቆስ ባቦን ሃሬቲ ቃሼቲዳይታ ሃይቆፔ ዋዛናሳ።

16 ኢዚ ሃ ዩዳይ ኪታንቻታ ማዳናሰ ጊዶንታ አብራሃሜ ዜሬላታ ማዳናሰ ዩዴሰ።

17 ሄሳ ጊሻሰ ኡባ ባጋራ ኢዚ ባ ኢሻታ ሚሳታናሰ ቤሲዛዴ ጊዲዴሰ፤ ኢዚ ሄሳ ኦሊዳይ ማሪዛዴኔ አማኔቲዳ ዋና ቄሴ ሃላቃ ጊዲዲ ጸሳሰ ኦላናሲኔ ዴሬዛ ናጋራፔ ማራናሳ።

18 ኢዚ ባ ሁኤን ፓጩቲዲ ሜቶ ኤኪዳ ጊሻሰ ፓጩቲዛይታ ማዳናሰ ዳንዳዬሰ።

3

ዩሱሲ ሙሴፔ አጼሰ

1 ሄሳ ጊሻሰ ሳሎፔ ጴይሲ አንቴና ጋኪን አማኒዛ ኑ ኢሻቶ! ኑ አማኖሰ ሃዋሬኔ ቄሴታ ሃላቃ ጊዲዳ ዩሱሳ ቆፒቴ።

2 ሙሴይ ጸሳ ኬላ ኡባ ቦላ አማኔቲዳዴ ጊዲዳ ማላ ዩሱሲካ ባና ሹሚዳዴሰ አማኔቲዳዴ።

3 ኬሌ ኬጺዳዴሰ ኬላሬ ቦላራ ቦንቸይ ዲዛ ማላ ዩሱሳሰካ ሙሴፔ አጼዛ ቦንቸይ ቤሲዛዴ ጊዳናሰ ቤሴሰ።

4 ኬሌ ኡባሲካ ኬጺዳዴይ ዴሰ፤ ጊደ አቲን ዉርሲካ ኦሊዳይ ጸሳ።

5 ሙሴይ ቲንቢቴ ማርካቲሼ ጸሳ ኬል ኡባ ቦላ ኢሲ አማኔቲዳ ኦሳንቻ ማላ ጊዲ ዳኢዴሰ።

6 ኪርሰቶሲ ጊዲኮ ጸሳ ኬላ ቦላ አማኔቲዳ ና ማላ። ኑኒካ ኢዛ ቦላ አማኔቲዛ ኡፋይሳይኔ ጨቄቲዛ ሂዶታ ሎኤሌ ኦይኪኮ ኑ ኢዛሰ ዱሳ ኬላ።

ጸሳ አሳሰ ኢማቲዳ ቆፊሶ ቃላ

7 ሄሳ ጊሻሰ ጸሎ አያናይ ጊዛ ማላ፥

«ኢንቴ ሃች ኢዛ ቃላ ሲዪኮ

8 ባዞ ቢታን ኢንቴ ታና

ፓጪዳ ዋዴ ማካሊዳይሳሶ

ኢንቴ ዋዚና

ሙሚሶፒቴ።

9 ኢንቴ አዋቲ ካሴ

ሄን ታና ፓጪዳኔ

ታናራ ኤቄቲዳ።

ታ ኦሊዳይሳ ወርሲ

ኦይዱ ታሙ ላይል

ጋካናሰ ቤኢዳ።

10 ሄ ዋዴ ዬሌታታ ቦላ

ታ ሃንቄቲን

ኢሰታ ዋዚናይ ኡባ ዋዴ

ባሌቴሰ፤

ኢሰቲ ታ ኦጌ ኤሪቤቴና።

11 ቃሴ፥ «ታ ኢሰታሰ ኢሚዛ ሽምፖሶ

ኢሰቲ ሙሊካ ጌሌቴና!»

ጋዳ ታኒ ታ ሃንቆን ጫቃዲሰ» ጌሰ።

12 ታ ኢሻቶ! ኢንቴፌ ኦኒካ ዴኦ ጸሳፌ ሃራሶ ኢንቴና ሃሲዛ ኢታኔ አማኖንታ ዋዚናይ ዶንታ ማላ ናጌቲቴ።

13 ሃራፔካ ኢንቴ ጋርሳፌ ኦኒካ ናጋራን ባሊቲዲ ባ ዋዚና ሙሚሶንታ ማላ፥ «ሃች» ጌቲቲሺን ሃች ሃች ኢንቴ ኢንቴ ጋርሳን ሚኔቲቴ።

14 ኦሰ ካሴ ኮይሮፔ ዲዛ አማኖ ኦኒ ወርሴል ጋካናሰ ሎኤሌ ሚንሏ ኦይኪኮ ኦኒ ኪርሰቶሳራ ኢሲፌ ላታና።

15 ሄሲካ፥ «ኢንቴ ሃች ኢዛ ቃላ ሲዪኮ ካሴ ማካሊዳይታይሳ ማላ ሃኒካ ኢንቴ ዋዚና ኢንቴ ሚንሶንታ ማላ» ጌቲቴ ጌሻ ማጸፋን ጸፊቲዳይሳሶ ሃኒዴሰ።

16 ሲዬዲ ማካሊዳይቲ ኢስቲ ኦናንቴ? ሙሴይ ገብጾፔ ካሌሊ ከሲዳይታ ኡባታ ገዴቲኔ?

17 ጸሲ ኢስታ ቦላ ኦይዱ ታሙ ላይላ ሃንቄቲዳይቲ ኢስቲ ኦናንቴ? ናጋራ ኦሊን ኢስታ ኣሃይ ባዞ ቢታን ኩንዲ ኣቲዳይታ ገዴቲኔ?

18 ኢዛስ ኣዛዜቶንታ ኢዲዳይታፔ ኣቲን ኢዛ ሽምፖሶ ጌሎንታ ማላ ኢዚ ጫቂ ዲጊዳይ ሃራይ ኦናንቴ?

19 ሄሳ ጊሻስ ኢስቲ ጌሎንታ ኣቲዳይ ኣማኖይ ባይንዳ ጊሻስ ጊዲዳይሳ ኑ ኤሮስ።

4

ጸሳ ዴሬስ ኢሜቲዳ ሳምባታ ሽምፖ

1 ጌዴ ሽምፖሶ ጌላናስ ኢሜቲዳ ሂዶታይ ሃኢካ ናጌቲ ዲዛ ጊሻስ ኢንቴ ጊዶፌ ኦኒካ ሄሳስ ቤሶንታዴ ጊዶንታ ማላ ኣኔ ናጌቶስ።

2 ሄይታንታስ ሳባኬቲዳ ማላ ኦስካ ሚሺራቾ ቃላይ ሳባኬቲዳስ፤ ጊዲኮካ ሲዬዳ ኣሳታራ ሲዬዳ ቃላይ ኢስታራ ኣማኖን ዋላኬቶንታ ኣጊዳ ጊሻስ ኢስታ ጎኢቤና።

3 ኑ ቃሴ ኣማኒዛይቲ ሄ ሽምፖሶዛ ጌላና። ጸሲ፡ «ሄሳ ጊሻስ ታኒ ታ ሃንቆን፡ ታ ኢስታስ ኢማና ጊዳ ሽምፖሶዛ ኢስቲ ሙሌካ ጌሌቴና» ጋዳ ታ ጫቃዲስ» ጊዴስ። ጊዶ ኣቲን ሃይሲ ኣላሜይ ሜዴቶሶፔ ሃ ሲሚን ኢዛ ኦሶይ ፖሌቲዴስ።

4 ኢሲ ሶሆን ላፑንፋ ጋላሳ ጊሻስ፡ «ላፑንፋ ጋላሲ ጸሲ ኦሶ ኡባፌ ሽምፒዴስ» ጌቲቲ ጌሻ ማጻፋን ጸፊቲዴስ።

5 ቃሴካ ሄ ሶዛን፡ «ቱማፔ ኢስቲ ታ ሽምፖሶ ሙሌካ ጌሌቴና» ጌሶ።

6 ኢዛ ሽምፖሶ ቡሮ ጌላና ኢሲ ኢሲ ኣሳቲ ዴቴስ፤ ካሴ ኢስታስ ሚሺራቾ ቃላይ ሳባኬቲዳይቲ ኣዛዜቶንታ ኢዲዳ ጊሻስ ኢዛ ሽምፖሶ ኢስቲ ጌሊቤቴና።

7 ሄሳ ጊሻስ ጸሲ፡ «ሃች» ጊዲ ቃሴካ ሃራ ጋላስ ዋሊዴስ፤ ሄሲካ ዳሮ ላይላታፔ ጉዬ ዳዊቲ ባጋራ።

«ሃች ኢንቴ ኢዛ ቃላ ሲዬኮ

ኢንቴ ዋዚና ሙሚሶፒቲ»

ጌቲቲ ካሴ ዮቴቲዳ ማላ ሃኒዴስ።

8 ኢያሶይ ኢስታስ ሾምፖ አሚዳኮ ጸሲ ሃራ ጋላስ ጊዲ ዮቴናኮሺን።

9 ሄሳ ጊሻስ ሳምባታ ጋላስ ሾምፖይ ጸሳ ዳሬስ ሃኢካ ዳስ።

10 ጋሶይካ ጸሳ ሾምፖሶ ጌሊዛይ ወሪ ጸሲ ኦሴ ሾምፒዳ ማላ ኢዚካ ባ ኦሶፔ ሾምፓና።

11 ሄሳ ጊሻስ ኦኒካ ሄይታንታ ማላ ኣዛዜቶንታ ኢዲዳይሳ ሌሚሶ ካሊዲ ኩንዶንታ ማላ ሄ ሾምፖሶዮ ጌላናስ ኣኔ ሚናስ።

12 ጸሳ ቃላይ ፓጾ ዲዛይሳኔ ኦሴዛ ቃላ፤ ናምኡ ባጋ ቃራ ማሻፌካ ኣጂ ቃራ፤ ሾምፖኔ ኣያና፣ ሻያኔ ኮልቼካ ሻካና ጋካናስ ጫዴስ፤ ዋዚና ቆፋኔ ኣሞቴላካ ፓጪ ጸሌስ።

13 ጸሳ ኣይፌፔ ጌሜቲዳ ሜጴታይ ሙሌካ ዳና፤ ኑ ኢዛስ ኑ ጊሻስ ዛሮ አማናስ ቤሲዛ ኢዛ ሲንላን ሃናይ ወሪካ ካሎ ቆንጩን ቤታና።

ቄሴታ ሃላቃ ዩሱሳ

14 ሄሳ ጊሻስ ፑዴ ሳሎ ቢዳ ቄሴታ ሃላቃ ጸሳ ና ዩሱሲ ኑስ ዲዛ ጊሻስ ኣኔ ኑኒ ኑ ኣማኖ ሚንሊ ኦይኮስ።

15 ኑ ዳቡርሺን ኑስ ቃጴታና ዳንዳይዛ ቄሴታ ሃላቃይ ኑስ ዳስ፤ ኢዚ ኑ ማላ ኡባ ሚሻን ፓጩቲዳስ፤ ጊዲኮካ ኢዚ ኣይኮ ናጋራካ ኦሴቤና።

16 ሄሳ ጊሻስ ኑኒ ማሮቴላ ኤካናሲኔ ኑና ኮሺዛ ዋዴ ኑና ማዲዛ ኢዛ ኪያቴላ ኑ ዳማና ማላ ጌዴ ኢዛ ማሮቴላ ኣልጋኮ ኣኔ ኣማኖን ሺቆስ።

5

1 ቄሴታ ሃላቃ ጊዲ ሹሜቲዛዴይ ዳሮ ኣሳ ጊደፌ ዶሬቴሲኔ ኣሳ ጊሻስ ጊዲዲ አሞታኔ ናጋራ ጊሻስ ያርሾ ሺሻናስ ዶሬቴሲ።

2 ኢዚካ ባ ባጋራ ዳቡራንቻ ጊዲዳ ጊሻስ ኤርንታ ኣሳታሲኔ ኦጌ ባሊዳይታስ ቃጴታና ዳንዳይሰ።

3 ኢዚ ባ ናጋራ ጊሻሲኔ ሃራ ኣሳታ ናጋራ ጊሻስ ያርሾ ሺሻናስ ኢዛስ ቤሲዛይ ሄሳ ጊሻሳ።

4 ኣሮኔይ ጳይጌቲዳይሳሶ ኢዚ ጸሲ ጳይጌዳዴ ጊዳናስ ቤሴስ ኣቲን ሄሳ ሄ ቦንቾዛ ባርካ ባስ ኤኪዛዴይ ዳና።

5 ሄሳሶካ ኪርሰቶሲ ቄሴታ ሃላቃ ጊዳና ቦንቾ ባርካ ባስ ኤኪቤና፤ ጊደ ኣቲን።

«ኔ ታ ናኮ፤

ታ ኔሰ ሃች አዋ ጊዳዲሰ»
ጊዳ ጸሳፌ ኤኪዴሰ።

6 ሄሳቶካ ሃራሶን

«ማልኬጼዴቄ ሹማታ ማላ
ኔኒ ሜርናሰ
ቄሴታ ሃላቃ» ጌሰ።

7 ዬሱሲ ሃይሳ ቢታ ቦላ ዲዛ ዋዴ ኢዛ ሃይቆፔ አሻና ዳንዳይዛይሳኮ አፋንጸሺ ቃላ ቶቄ ሂስቲ ዋሲዴሰ። አዳፌ አሽኬቴላራ ኢዚ አዛዜቲዳ ጊሻሰ ኢዛ ዋሳካ ጸሲ ሲዪዴሰ።

8 ኢዚ ጸሳ ና ጊዳኮካ ባ ኤኪዳ ዋዬዛፔ አዛዜቴል ታማርዴሰ።

9 ሄሳ ባጋራ ፓጩይ ባይንዳዴ ጊዲ ቤቲዳይሳፌ ጉዬ ባሰ አዛዜቲዛይታሰ ኡባሰ ሜርና አቶቴላሰ ጋሶ ጊዲዴሰ።

10 ማልኬጼዴቄ ሹማቴላ ማላ ቄሴታ ሃላቃ ጌቴቲ ጸሳን ሹማቲዴሰ።

አማኖን ሚናና ማላ አሜቲዳ ቆፊሶ

11 ሄሳ ጊሻሰ ኑ ሃሳያና ሚሺ ቡሮ ዳርይ ዴሰ፤ ጊዶ አቲን አንቴ ዶታኦታ ጊዲዳ ጊሻሰ አንቴና ኤሪሶይ ሜቶ።

12 አንቴ ሃኒ ዋዴ አስታማሬ ጊዳናሰ ቤሲሺን ጸሳ ቃላ ቡሮ ኮይሮፔ ዴንፊዲ አንቴና ታማርሲዛ አሰ አንቴሰ ኮሼሰ። አንቴሰ ሚኖ ካል ጊዶንታ ማል ኮሼሰ።

13 ማል ፓሄቲዛይ ቂ ጉላ ና ጊዲዛ ጊሻሰ ሎኦኔ ኢታ ሻኪዛ ቲሚርቴ ሻኪ ኤሬና።

14 ሚኖ ካል ጊዲኮ ሎኦኔ ኢታ ሻኪ ኤራናሰ ዳንዳይዛ ዋዚና ኩንፊዳ አሳታሳ።

6

1 ሄሳ ጊሻሰ ኮይሮፔ ኪርሰቶሳ ጊሻሰ አሜቲዳ ቲሚርቴዛ አጊዲ አኔ ጌዴ ሚኖ ቲሚርቴኮ ቦሰ። ሃይቂዳ አሶፔ ማርቴላን ጌሎ ጊሻሲኔ ጸሳን አማኖ ጊሻሰ አኔ ኢዛን ቡሮ ዋዲ ማጶኮ።

2 ሄሳቶካ ጸንቃታ ጊሻሲኔ ኩሼ አሳ ቦላ ዋል ጊሻሰ ቃሴካ ሃይቂዳይታ ዴንላ ጊሻሲኔ ሜርና ፒርዳ ጊሻሰ ቡሮ ዋል ዶሞኮ።

3 ጸሳ ሼኔ ጊዲኮ ኑ ሄሳሉ አላና።

4 ባ አማር ካዲዳ አሳታ ኢስታ ማሮቴላን ዋስቲ ዞራኔ? ሄ አሳቲ ፖኦይ ኢስታስ ኢሲቶ ፖኢዳይታ ሳሎ ኢሞቴላ ኤኪ ቤኢዳይታ፡ ደሎ አያና ኤኪ ቤኢዳይታ፡

5 ጸሳ ሎኦ ቃላኔ ቡሮ ያና አላሜዛ ዋልቃ ኤኪ ቤኢዳይታ፡

6 ዛሪ ካዲዳይታ፡ ኢስታ ናሞአንሉ ዛሪ ማሮቴላን ኤኮይ ዳንዳዬቴና፤ ጋሶይካ ኢስቲ ባ ሞሮሰ ጸሳ ና ዛሪ ካቄቴሲኔ ካወሸቴስ።

7 ኡባ ዋዴ ኢራ ኡዪዛ ቢታያ ቃሴካ ኢዛ ጎዪዛዴሰ አይፌ ኢሚዛ ቢታያ ጸሳ አቻን አንጄታዱስ።

8 ጊዶ ኣቲን አጉንሴኔ ኦዶሮይ ሞኪዛ ቢታያ ጎኣይ ባይንዳር ጊዳና፤ ሄ ቢታይስ ቃንጌቴሉ ማታን ዴስ፤ ኢዚ ወርሴሉ ታማን ጸጌቴሉ ጊዳና።

9 ታ አሻቶ! ኦኒ ሄሳሉ ሃሳይኮካ ኢንቴስ ኢንቴ አቶቴላራ አይኬቲዳ ሎኦ ሚሺ ዲዛይሳ ኑ ሲጾኮ።

10 ካሴ ጊዲን ዋይኮ ሃኢ ጊዲንካ ኢንቴ አማኒዛይታ ማዲዳይሳኔ ኢዛ ሱንሳ ጊሻስ ኢንቴ ቤሲዳ ሲቆቴላ ባላናስ ጸሲ ማካላንቻ ጊዳና።

11 ኢንቴስ ኢሜቲዳ ሂዶታይ ፖሌታና ጋካናስ ኢንቴፌ ኢሲ ኢሲ አሲ ሄሳ ማላ ኦሶ ወርሴሉ ጋካናስ ጌንጪዲ ኦላና ማላ ኑ አሞቶስ።

12 አማናኒኔ ዳንዳያን ኢንቴ ኢዛ ሂዶታ ቃላ ላቲዛይታ ሚሳታናፔ ኣቲን ዶታኣታ ጊዳናይሳ ኑ ኮዮኮ።

ጸሲ ኢሚዳ ሂዶታ ቃላ ቱማቴሉ

13-14 ጸሲ አብራሃሜስ ሂዶታ ኢሚዳ ዋዴ ጫቂሽ ሃራ ኢዛፔ አጲዛዴይ ባይንዳ ጊሻስ ባርካ ባናን፡ «ታ ኔና ቱማቴ አንጃና፤ ታኒ ኔ ዜሬሉ ዳርሳና» ጊ ጫቂዴስ።

15 አብራሃሜይካ ጌንጪ ናጊዳፔ ካሊዲ ኢዛስ ኢሜቲዳ ሂዶታ ዴሚዴስ።

16 አሳይ ጫቆ ጫቂሽ ባፔ ጾቃን ጫቄስ፤ ጫቆዚካ ጌቴቲዳይሲ ፖሌታና ማላ ሚንሴዛ ጊሻስ ጫቂዳይታ ጊዶን ፓላማይ ዴንዲኮ ካሴ ጫቆ ቃላይ ዲጌስ።

17 ጸሲ ላሜቶንታ ባ ቆፋ ሂዶታ ቃላ ላታናይታስ ቆንጪሳና ማላ ኮዪዳ ጊሻስ ጫቆ ቃላን ሚንሴዴስ።

18 ጸሲ አይ ዋዴካ ዋርዶታናሰ ዳንዳዬና፤ ኢዚ ላሜቶንታ ናምኡ ሚሻታን ኑ ሲንፋን ዲዛ ሂዶታ ኦይካናሰ ኢዛኮ ሸቂዳ ኑኒ ጌታ ሚኖቴላ ዳማና ማላ ኦላዴሰ።

19 ኑኒካ ሸዋፖ ቱቄ ጌዲዳ ሚኖኔ አማንሉዛ ሂዶታ ዳሚዶሰ፤ ሄ ሂዶታይካ ማጋላሻዛፔ ጉዬ ባጋራ ዲዛ ጌዴ ጸሳ ኬላ ጌዶ ጌሌሰ። *

20 ሄ ሶዚካ ኑ ጌሻሰ ዩሱሲ ካሴቲ ጌሊዳሶ፤ ኢዚካ ማልኬዴዴቄ ሹሜቴላ ማላ ሜርናሰ ቄሴታ ሃላቃ ጌዲዴሰ።

7

ቄሴታ ሃላቃ ማልኬዴዴቄ

1 ሄሲ ማልኬዴዴቄይ ሳሌሜ ካዎኔ ጸሳ ቄሴ፤ ኢዚካ አብራሃሜይ ካዎታ ኦሊ ጸኒዲ ሲሚሺን ዳሚዲ አብራሃሜ አንጂዴሰ።

2 አብራሃሜይካ ባሰ ዲዛ ኡባፌ ታሙ ኩሼፔ ኢሲ ኩሼ ኢዛሰ አሚዴሰ። ኮይሮ ኢዛ ሱንፋሰ ቢርሼላ፡ «ጸሎ ካዎ» ጉሳ፡ ካሊዲ ቃሴ፡ «ሳሌሜ ካዎ» ጉሲ፡ «ሳሮቴላ ካዎ» ጉሳ።

3 ኢዛሰ አያካ፡ አዋይካ ዋይኮ ኢዛ ዩሌታሰ ዛርኬይካ ባ፤ ኢዚ አይዴ ዩሌቲዲ አይዴ ሃይቂዳኮ ኤሪቲቤና፤ ኢዛሰ ዶሜሊኔ ዉርሴላ ባ፤ ጌዶ አቲን ጸሳ ና ማላ ሜርናሰ ኢዚ ቄሴ ጌዲዲ ዴሰ።

4 አኔ አንቴ ኢዚ አይ ማላ ጌታኮ ቆፒቴ፡ ሃራይ አቶሺን አዋታሰ ኡባሰ ኮይሮይ አብራሃሜይ ባ ዲኢ ኤኪዳ ኡባፌ ታማፌ ኢሳ ኬሲ አሚዴሰ።

5 ኢሰታሰ ቄሴቴላ አሜቲዳ ሌዌ ናይቲ ኢሰታ አሻቲ አብራሃሜ ዜሬላታ ጌዲኮካ ዴራፔ ሄሲካ ባ አሻታፔ ታማፌ ኢሳ ኤካና ማላ ኢሰታሰ ዋጋን አዛዜቲዴሰ።

6 ሃይሳ ሃ አዴዛ ዜሬላ ሌዌ ዜሬላ ጌዴና፤ ጌዶ አቲን ኢዚ አብራሃሜፔ ታማፌ ኢሳ ኤኪዴሰ፤ ካሴ ኢዛሰ ሂዶታ ቃላይ አሜቲዳ አብራሃሜ አንጂዴሰ።

7 ባይራይ ካሎ አንጂዛይሲ ዋጋ።

8 ኢሲ ባጋራ ታማፌ ኢሳ ኤኪዛይቲ ሃይቂዛይታ፤ ሃራ ባጋራ ቃሴ ታማፌ ኢሳ ኤኪዛይይ ሃይቆንታ ፓጾ ዲዛ ማላ ኢዛሰ ማርካቲዳይይ ማልኬዴዴቄ።

* 6:19 ማጋላሻ ገዛይሳ ኢሲ ኢሲ ባጋ ጋዋፍን ቃላን ማጋራጃ ጌቲሰ። 6:19 ሌዌ 16:2 7:5 ታይ 18:21

9 ሃራይ አቶሺን ለዌይካ ኣብራሃሜ ባጋራ ታማፌ ኢሳ ኬሲዳስ ጋናስ ዳንዳዬቲስ።

10 ጋሶይካ ማልኬዴዴቄይ ኣብራሃሜራ ጋጊዛ ዋዴ ለዌይ ቡሮ ባ አዋ ኣብራሃሜፔ ዩሌቲቤና።

ዩሱሲ ማልኬዴዴቄ ማላ

11 ፓጩይ ባይንዳ ፖሎይ ቤቲዳይኔ ዋጋይ ዴሬዛስ አሜቲዳይ ለዌ ቄሴቲላ ማላ ጊዲዳኮ አሮኔ ማላ ጊደንታ ማልኬዴዴቄ ሹሜቲላ ማላይ ሃራ ቄሴይ ያናስ ኣዛስ ኮሺዴ?

12 ቄሴቲላ ዛርኬይ ላሜቲዛ ዋዴ ዋጋይካ ላሜታናይሲ ኣቶንታ ሚሻ።

13 ሄሲ ዉሪካ ኢዛስ ዮቲቲዳ ቄሴይ ኢዚ ሃራ ዜሬላ፤ ኢዛ ዜሬላፌ ኦኒካ ያርሾሶን ኦሊ ኤሪዛዴይ ባ።

14 ኦ ጎዳይ ዩሁዳ ባጋፌ ዩዳይሲ ቱማ፤ ሙሴይ ቄሴታ ጊሻስ ዮቲሼ ሃ ዜሬላ ጊሻስ ዮቲዳይሲ ኢሲ ሚሺካ ዴና።

15 ማልኬዴዴቄ ማላይ ሃራ ቄሴይ ዴንዲኮ ኦ ካሴ ዮቲዳ ዮኦይ ዳሮ ቆንጩ ጊዴና።

16 ኢዚ ቄሴ ጊዲዳይ ላዮንታ ዴኦ ዋልቃን ኣቲን ዜሬላፌ ዩዳ ዋጋፔ ጊዴና።

17 ኢዛስ፡ «ኔ ማልኬዴዴቄ ሹሜቲላ ማላ ሚርናስ ቄሴ» ጊ ማርካቲዴስ።

18 ካሴ ኣዛዞይ ላፋኔ ጎኦንታይሳ ጊዲዳ ጊሻስ ኣቲዴስ።

19 ዋጋይ ኦናካ ጌሻናስ ዳንዳዮንታ ጊሻስ ኦኒ ጸሳ ኣኙ ሺቃናስ ኢዛፔ ኣፂዛ ሃራ ሂዶታይ ኦስ አሜቲዴስ።

20 ሄሲካ ጫቆይ ባይንዳ ሃኒቤና፤ ሃንኮ ቄሴ ጊዲዳይቲ ጫቆይ ባይንዳይታ።

21 ኢዚ ጊዲኮ ቄሴቲላ ጫቆን ኤኪዴስ።

ጋሶይካ ጸሲ ኢዛ ጊሻስ፡

«ጎዳይ ጫቂዴስ፤

ባ ቆፋ ኢዚ ላሜና፤

ኒህ ሚርናስ ቄሴ» ጊዴስ።

22 ሄሳ ማላ ጫቆፔ ዴንዲዳይሳን ዩሱሲ ሄሳፌ ኣፂዛ ጫቆ ቃላስ ዋሴ ጊዲዴስ።

23 ካሴ ቄሴቲ ባ ኦሶን ሲንፊ ጉጅንታ ማላ ሃይቆይ ኢስታ ዲጊዳ ጊሻስ ቆዳይ ኢስታስ ዳሮ።

24 ዩሱሲ ጊዲኮ ሚርናስ ዲዛዴ ጊዲዳ ጊሻስ ኢዛ ቄሴቲሊ ሻሬቶንታ ቄሴቲላ።

25 ሄሳ ጊሻስ ኢዚ ኢስታ ጊጊሳና ጋናቲሼ ኡባ ዎዴ ሃይቆንታ ፓጸ ኤቂ ዲዛ ጊሻስ ኢዛ ባጋራ ጸሳኮ ዪዛይታ ኡባ አሻናሰ ዳንዳዬስ።

26 ሄሳ ጊሻስ ኑስ ኮሺዛ ቄሴታ ሃላቃይ ሄሳ ማላ ጌሺኔ ዎሶይ ኢዛ ቦላ ባይንዳ ጸሎኔ ናጋራንቻታፔ ሻኬቲዲ ሳሎታፔ ቦላራ ቦንቹቲዳ ቄሴታ ሃላቃ።

27 ኢዚ ሃንኮ ቄሴታ ሃላቃታ ማላ ኮይሮ ባ ናጋራ ጊሻስ ቃሴካ ሃንኮ ዴሬዛ ናጋራ ጊሻስ ጋላስ ጋላስ ያርሾ ሺሻናሰ ኢዛ ኮሺና፤ ኢዚ ባና አሊ ኢሚዳ ዎዴ አሳ ናጋራ ጊሻስ ኢሲቶ ሲንላ ባጋሳራ ያርሾ ወርሲ ፖሊዴስ።

28 ዎጋይ ዳቡራንቻ አሳታ ቄሴታስ ዋና ሃላቃ ሂስቲ ሹሜስ። ዎጋፔ ካሊዲ ዪዳ ጫቆ ቃላይ ጊዲኮ ሜርናሰ ኢዛ ቦላ ዎሶይ ባይንዳ ናዛ ሹሚዴስ።

8

ኦራላ ጫቆ ቄሴ ሃላቃ ዬሱሳ

1 ሄሳ ጊሻስ ኑ ሃኢ ኦላና ዋና ዮኦይ ሃይሳ፤ ሃይሳ ማላ ሳሎ ቦላ ጸሳ ቦንቹ አልጋ ኡሻቻን ኡቲዳ ቄሴታ ሃላቃይ ኑስ ዴስ።

2 ኢዚ አሲ ቶኪዳ ዳንካኔ ጊዶን ኦሊዛዴ ጊዶንታ ጎዳ ጸሳይ ቶኪዳ ቱሙ ዳንካኔን ጊሻሶሆን ኦሊዛዴ።

3 ቄሴታ ሃላቃይ ሹሜቲዛይ አሳይ ጸሳስ ኢሚዛይሳ ጸሳስ ሺሻናሰኔ ያርሾ ያርሻናሳ፤ ሄሳ ጊሻስ ሃይሲ ሃ ቄሴታ ሃላቃይካ ጸሳስ ሺሻናሰ ኢሲ ሺሺዛ ሚሽ ኢዛስ ኮሺስ።

4 ኢዚ ቢታ ቦላ ዲዛኮ ቄሴ ጊዴና፤ አዛስ ጊኮ ዎጋይ ጊዛ ማላ ያርሾ ሺሺዛ ሃራ ቄሴቲ ዴቲስ።

5 ኢስቲ ካሴ ሳሎን ዲዛ ጸሳ ኬላይሰ ለሚሶኔ ኤሾ፤ ሙሴይ ዳንካኔዛ ኦላና ጊሺን፡ «ኔስ ዙማ ቦላ ቆንጪዳይሳሉ ወርሳ ኦላናሰ ናጌታ» ጊዛ አዛዞይ ሄሳ ጊሻስ ኢዛስ ኢሜቲዴስ።

6 ጊዶ አቲን ዬሱሲ ጊዶ ጌሊ ጋናቲዛይ ጫቆ ቃላይ ካሴይሳፌ አጂዛይሳ ማላ ኢዚ ኤኪዳ ኦሶይካ ካሴይታ ኦሶፔ አጂስ፤ ሄሲካ ካሴይሳፌ ሎኢዛ ሂዶታ ቃላና።

7 ካሴ ጫቆ ቃላን ፓጩይ ባይንዳኮ ናምኣንሉ ሃራ ጫቃናሰ ኮሺና።

8 ጊደ ኣቲን ጸሲ ዴሬዛ ቦላ ፓጮይ ዲዛይሳ ዴሚዳ ጊሻሰ፡
«ኢስራኤል ኣሳራኔ የሁዳ ኣሳራ ታኒ ኦራላ ጫቆ ጫቂታና ዋዴይ
ያና።

9 ሄሲካ ታ ኢስታ ጊብጾፔ ኬሳናሰ ኢስታ ኩሼ ኦይካዳ ካሴ
ኢስታ ኣዋታራ ጫቂቲዳ ቃላ ማላ ጊዴና፤ ጋሶይካ ኢስቲ ካሴ
ታ ጫቆ ቃላን ኤቂቤቴና፤ ታኒካ ኢስታ ዬዳ ቤሳዲሰ።

10 «ሄሳፌ ጉዬ
ኢስራኤል ኣሳራ
ታ ጫቂታና ቃላይ
ሃይሳ ማላ ጌሰ ጎዳይ።
ታኒ ታ ዋጋ
ኢስታ ዋዚናን ዋላና፤
ኢስታ ዋዚና ቦላካ ጸፋና።
ታ ኢስታ ጸሰ ጊዴና፤
ኢስቲካ ታ ዴሬ ጊዴና።

11 ሃይሳፌ ጉዬ ኣሲ
ባ ጉታ ኣሳ ዋይኮ
ባ ኢሻ፤ «ኔ ጎዳ ኤራ»
ጌ ታማርሴና።
ጋሶይካ ኣሲ ጉላፌ
ጌታታ ጋካናሰ
ወሪካ ታና ኤራና።

12 ኢስታ ቆሆዛ ታ ማራና።
ሃይሳፌ ሲንፋን ታ ኣሳ ናጋራ
ናምኣንሶ ዛራ
ቆፒኬ» ጌሰ።

13 ሃይሳ ሃ ጫቆዛ ኢዚ፤ «ኦራላ ጫቆ» ጊዲ ካሴ ጫቆዛ
ጋልኣ ኬሲዴሰ፤ ሄሳ ጊሻሰ ጋልኢዲ ወሪዳይሲ ጳያና ዋዴይ
ማቲዴሰ።

9

ቢታ ቦላኔ ሳሎን ዲዛ ጎይኖ ዋጋ

1 ኮይሮ ጫቆ ቃላዛን ጸሳሰ ጎይኒዛ ዋጋይኔ ቢታ ቦላ ዲዛ
ጸሳ ኬሊ ዴሰ።

2 ካሴ ናምኤ ከፊሌራ ዲዛ ዲንካኔይ ጊጌቲ ዴሰ፤ ኮይሮ ከፊሌዛን ጾምፔ ዋሊዛሶይኔ ጸራጴዛይ ቃሴ ኡኩሊ ዴሰ፤ ሄሳ ሄ ከፊሌዚ ዲማ ከፊሌ ጌቲቲሰ።

3 ናምኣንሶ ከፊሌዚ ናምኣንሶ ማጋላሻፔ ጉዬ ባጋራ ዲዛ ከፊሌይ ኡባፌ ዲማ ጌቲቲሰ።

4 ሄሳ ጊዶን ዋርቃፌ ኦሴቲዳ ኤጸኔ ጨዋሲዛ ቄሪ ሹልኤ ማላይኔ ዋርቃን ሜሼቲዳ ጫቆ ቃላ ታቦታይ ዴሰ፤ ሄ ታቦታይካ ኢዛ ጊዶን ማናይ ዲዛ ዋርቃ ለማቲይ፥ ጨሊሊዳ ኣርኔ ጉፊይኔ ጫቆ ቃላቲ ኢዛ ቦላ ጸፊቲዳ ማሴቲዳ ሹቻቲ ዴቲሰ።

5 ሄ ታቦታዛ ቦላ ዲዛ ናጋራፔ ማሮቱላ ካማዛ ቦላ ባ ቄፊራ ካሚዛ ቦንቾ ከሩቤቲ ዴቲሰ፤ ሃኢ ቃሴ ኦ ሄይታንታ ኢሳ ኢሳ ጊሻሰ ሻኪ ሻኪ ሃሳያናሰ ዳንዳዮኮ።

6 ወሪካ ሄሳሶ ጊጌቲዳፔ ጉዬ ቄሴቲ ባ ኦሶ ፖላናሰ ዲንካናሰ ኮይሮ ከፊሌ ጌሌቲሰ።

7 ጊዲኮካ ኡባፌ ጊዶቲዛ ከፊሌ ቄሴታ ሃላቃይ ጸላ ጌሌሰ፤ ሄሲካ ላይላን ኢሲቶ ጸላ ጊዲሺን ኢዚ ባ ናጋራ ጊሻሰኔ ዴሬይ ኤርንታ ኦሊዳ ናጋራ ጊሻሰ ሺሺዛ ያርሾ ሱሉ ኦይኮንታ ሙሌካ ጌሌና።

8 ኮይሮ ዲንካኔዚ ካሴ ዲዛ ዋዴ ጌዴ ኡባፌ ዲማ ጌቲቲዛሶ ኤፊዛ ኦጌይ ሄ ዋዴ ቆንጨፔ ጊዶንታይሳ ጸሎ ኣያናይ ቤሴሰ።

9 ሄሲካ ሃይሳ ሃ ዋዴዛሰ ለሚሶ ጊዲሺን ካሴ ሺቂዛ ያርሾቲኔ ጮ ኢሜቲዛ ኢምታቲ ኢሚዛይታ ዋዚና ሽምፒሳናሲኔ ሙሊ ጌሻናሰ ዳንዳይቤቲና።

10 ሄይታንቲ ወሪካ ኦራላ ዋጋይ ያና ጋካናሰ ጮ ሜላ ዶና ሃሳያ ማላ፤ ቃሴካ ኢሰቲ ሙሳ ጊሻሰኔ ኡሻ ጊሻሰ ቃሴካ ዲማ ዲማ ጌሾ ዋጋታ ጸላ።

ከርሰቶሳ ሱሉ

11 ጊዲኮካ ከርሰቶሲ ቡሮፔ ያናሰ ዲዛ ሎኦ ሚሻታሰ ቄሴታ ሃላቃ ጊዲዲ ቆንጨዴሰ፤ ኢዚ ኢዛን ጌሊዳ ዲንካኔዚ ጊታኔ ጌሻ፤ ሄ ዲንካኔዚ ኣሳ ኩሼን ኦሴቶንታይሳኔ ሃይሳ ሃ ሜጴቱላፌ ጊዴና።

12 ኢዚ ሄ ዲንካኔዛን ጌሊሹ ዴይሻታ ሱሊኔ ዋፋኖ ቦራታ ሱሉ ኤኪ ጌሊቤና፤ ጊዶ ኣቲን ኣሰ ኣሻናሰ ሜርናሰ ባ ሱሉ ኤኪዲ

ኡባፌ ዲማ ጌቴቲዛ ኪፊሌዛ ሃራ ዋዴ ናምኣንሉ ጌሎንታ ማላ ወርሴላ ጌሎ ጌሊዴሰ።

13 ኢስታሰ ካሬ ባጋ አሳቴላይ ቱኒዳ አሳታ ቦላ አራጪዛ ዴይሻ ሱሊኔ ዋፋኖ ቦራታ ሱሊ ሄሳሶካ ያርሾሰ ጽጌቲዳ ኡሳ ቢዲንሊ ኢስታ ጌሺዛይሳ ገዲኮ።

14 ሜርና ኣያናን ባና ዋሶይ ባይንዳ ያርሾ ኦሊ ጸሳሰ ሺሺዳ ኪርሰቶሳ ሱሊ ኑኒ ዴኦ ጸሳሰ ጎይናናሰ ሃይቁላ ኦሶፔ ኑና ኣይ ማላ ኣሊ ጌሻንዴ?

15 ሄሳ ገሻሰ ጸይጌቲዳይቲ ኢስታሰ ኣማና ጌቴቲዳ ሜርና ላታ ኤካና ማላ ኪርሰቶሲ ኦራላ ጫቆሰ ጋናቲዛዴ ገዲዴሰ፤ ኮይሮ ጫቆዛ ጋርሳን ዲዛ ዋዴ ኢስቲ ኦሊዳ ናጋራፔ ጌያና ማላ ኢስታ ገሻሰ ኢዚ ሃይቁዴሰ።

16 ባዛይ ባዜቲዛይሳ ገዲኮ ባዚዳዴ ሃይቆ ሻኪ ኤራናሰ ቤሴሰ።

17 ጋሶይካ ባዛይ ሚኒዛይ ባዚዳዴይ ሃይቁና። ባዚዳዴይ ፓጽ ዲሺን ባዛይ ኣይኮካ ኦሌና።

18 ሄሳ ገሻሰ ኮይሮ ጫቆ ቃላይ ሱሊ ባይንዳ ሚኒቤና።

19 ሙሴይ ባ ኣዛዞ ዋጋ ዴራሰ ዮቲ ሲሚዲ ዴይሻታ ሱሊኔ ዋፋኖ ቦራታ ሱሊ ሃሳራ ኤኪዲ ዞኦ ዶርሳ ኢሰኬን ኤጩሬ ወርጩ ሚሳቲዛ ሂሶጼ ጌቴቲዛ ሚሳራ ኤኪዲ ባ ጸፊዳ ዋጋ ማጸፋ ቦላኒኔ ዴሬዛ ቦላ ወጺዴሰ።

20 «ኢንቴ ናጋና ማላ ኢንቴና ጸሲ ኣዛዚዳ ጫቆ ቃላ ሱላይ ሃይሳ» ገዴሰ።

21 ሄሳሶካ ዲንካኔዛኔ ኢዛ ገዶን ዲዛ ኦሶ ሚሻ ኡባ ቦላ ሱሊ ወጺዴሰ።

22 ኣዳፊካ ጉላ ሚሻቲ ኣቲሺን ሃንኮ ዳሮ ሚሻይ ሱላን ጌያናሰ ቤሲዛይሳ ዋጋይ ኣዛዜሰ፤ ሱሊ ጉኮንታ ዲሺን ማርይ ባ።

23 ሄሳ ገሻሰ ሳሎ ሚሻታሰ ለሚሶ ገዲዳይቲ ሃይታንታን ጌያናይሲ ኣቴና ሺን፤ ሳሎን ዲዛ ሚሻቲ ገዲኮ ሃይሳፊካ ኣጳዛ ያርሾን ጌያናሰ ቤሴሰ።

24 ኪርሰቶሲ ቱሙ ዲንካኔይሰ ለሚሶኔ ኣሳ ኩሺን ኦሴቲዳ ጸሳ ኬሌ ጌሊቤና፤ ገዶ ኣቲን ሃኢ ኑ ገሻሰ ጸሳ ሲንላን ቤታናሰ ፑዴ ሳሎ ጌሊዴሰ።

25 ቂስታ ሃላቃይ ባ ሱል ጊደንታ ሱል ኤኪዲ ላይላን ላይላን ኡባፌ ዱማ ኪፊሌ ጌሊዛይሳሉ ኪርሰቶሲ ባና ያርሻናሰ ፑዴ ሳሎ ሽሬቲ ሽሬቲ ጌሊቤና።

26 ሄሳ ማላ ጊዲዛኮ ኪርሰቶሲ አላሜይ ሜዴቶሶፔ ሃ ሲሚን ዳሮ ዎዴ ሜቶ ኤካናሰ ቤሴሰ፤ ሃኢ ቃሴ ዎዴ ዉርሴላን ባና ያርሺዲ ናጋራ ዲጋናሰ ዉርሴላሰ ኢሲቶ ቆንጨዴሰ።

27 ሄሳሶካ አሲ ኢሲቶ ሃይቄሰ፤ ሄሳፌ ካሊዲ ፒርዳ ሲንላን ኤቃናሰ ገጊ ኡቲዴሰ።

28 ኪርሰቶሲ ዳሮ አሳ ናጋራ ዲጋናሰ ኢሲቶ ያርሹቲዴሰ፤ ናሞኣንሶካ ኢዚ ቆንጨና፤ ሄሲ ኢዛ ናገዛይታሰ አቶቴል ኤኪ ያናሰ አቲን ናሞኣንሶ ዛሪ ናጋራ ቶካናሰ ጊዴና።

10

ኪርሰቶሲ ኢሲቶ ሜርናሰ ሺሺዳ ያርሾ

1 ሙሴ ዎጋይ ቡሮ ሲንላራ ያና ሎኦ ሃኖታሰ ኤሾፔ አቲን ቱሙ አዳ ሜዳይ ኢዛሰ ዴና፤ ሄሳ ገሻሰ ላይላን ላይላን ፓጩይ ባይንዳ ሺሪ ሺሪ ሺሺዛ ያርሾይ ጸሰ ጎይናናሰ ሺቁዛ አሳ ጌሻናሰ ሙሌካ ዳንዳይቤና።

2 አሰ ሙሌራ ጌሻና ዳንዳይዛይሳ ጊዲዳኮ ኢሰቲ ያርሾ ያርሻናይሳ አጌቲኔ? ቃሴካ ጸሰ ጎይናና ሺቁዛ አሳይ ኢሲቶ ጌይዛኮ ባ ዎዚናራ ናጋራንቻ ጊዲዳይሳ ሲዳና።

3 ጊዶ አቲን ሄይቲ ያርሾቲ ላይላን ላይላን ናጋራ ዛሪ ዛሪ ቆፍሴቲሰ።

4 ጋሶይካ ዎፋኖታኔ ዴይሻታ ሱሊ አሳፔ ናጋራ ዲጋናሰ ዳንዳይና።

5 ሄሳ ገሻሰ ኪርሰቶሲ ሃይሳ ሃ አላሜዛ ዪዲ፥

«ኔኒ አሞታኔ

ያርሾ ኮያቤካ ሸን

ኔ ታሰ አሾ ገጊሳዳሳ።

6 ታማን ጽጌቲዛ ያርሾኔ

ናጋራ ገሻሰ ሺቁዛ ያርሾን

ኡፋዬታቤካ» ጊዴሰ።

7 ሄ ዎዴ ታኒ፥

«ታ ገሻሰ ጌሻ

ማጸፋን ጸፊቲዳ ማላ፥

«ጸሶ፡ ሄኮ ታኒ ኔ ሼኔ
ኦላናሰ ያዲሰ» » ጋዲሰ።

8 ሙሴ ዋጋይ ሄሲ ሄሳሉ ሃናና ማላ አዛዚኮካ ኢዚ ቃሴ ኮይሮ፡
«ያርሾ፡ ኢሞታ፡ ጽጌቲዛ ያርሾኔ ናጋራ ጊሻሰ ሺቂዛ ያርሾ ኔ
ኮያቤካኔ ኢዛን ኡፋዬታቤካ» ጌሰ።

9 ካሌሊዲካ፡ «ሄኮ ታ ኔ ሼኔ ኦላና ያዲሰ» ጊዴሰ። ናሞኣንሉዛ
ኤሳናሰ ኮይሮይሳ ዲጊዴሰ።

10 ሃይሳን፡ «ኢዛ ሼኔ» ጊዛ ቃላ ማላ ሃራ ያርሾ ዛሬላ ሺሻናሰ
ኮሾንታ ማላ ዬሱሰ ኪርሰቶሳ ባጋራ ኢሲቶ ሺቂዳ ያርሾን
ጌዪደሰ።

11 ቄሴይ ሃች ሃች ኤቂዲ ባ ኦሶ ፖሌስ፤ አሰ ናጋራፔ ጌሻናሰ
ዳንዳዮንታይታ ዋንቲን ዋንቲን ሺሼሰ።

12 ኪርሰቶሲ ጊዲኮ ያርሾ ኢሲቶ ሜርናሰ ጊዳናይሳ ሺሺዲ
አዋ ኡሻቻን ኡቲዴሰ።

13 ሄ ጋላሳፌ ሲሚን ኢዛ ሞርኬቲ ኢዛ ቶሆ ጋርሳን ዬጴታና
ጋካናሰ ናጎን ዴሰ።

14 ጋሶይካ ኢሲቶ ሺሺዲ ያርሾን ጌያና አሳታ ሜርናሰ
ጌሺዴሰ።

15 ሄሳ ሄ ሃናዛ ጊሻሰ ጸሎ ኣያናይካ ኦሰ ማርካቴሰ። ጎዳይ
ኮይሮ፡

16 «ሄሳፌ ጉዬ ታ ኢሰታራ ጌላና

ጫቆ ቃላይ ሃይሳ።

ታ ዋጋ ታ ኢሰታ ዋዚናን

ዋላና፤

ኢሰታ ዋዚናን ታ ጸፋና» ጌሰ።

17 ቃሴካ፡ «ታ ኢሰታ ናጋራኔ

ማካላ

ናሞኣንሉ ቆፒኬ»

ጌሰ ጎዳይ።

18 ሄይታንቲ ዉሪካ አቶ ጌቴቲዳፔ ጉዬ ናሞኣንሉ ናጋራሰ ሺቃና
ሃራ ያርሾይ ዴና።

ዉርሴላ ጋካናሰ ሚኒ ዳና ማላ ሺቂዳ ጴይሰ

19 ሄሳ ጊሻሰ ታ ኢሻቶ! ኦኒ ዬሱሰ ኪርሰቶሳ ሱላ ባጋራ
ጌዴ ኡባፌ ዲማ ጌሽ ጌቴቲዛሶዮ ጌላናሰ ጸላቴላ ዴሚደሰ።

20 ሄሲካ ማጋላሻ ባጋራ፤ ኢዚ ባ አሾ ባጋራ ኑስ ዶዶዳ ኦራሴኔ ዴኑ ጊዲዳ ኦጌና።

21 ጸሳ ኬላ ቦላ ሹሜቲዳ ቄሴታ ሃላቃይ ኑስ ዲዛ ጊሻስ።

22 ኑኒ ኑ ኢታ ቆፋፔ ጌያናሰ ኑ ዋዚና ኣራጨቲዲ ኑ ኣሳቴላካ ጸሎ ሃላን ሜጨቲዲ ቱሙ ዋዚናፔኔ ኩሜላ ኣማኖን ጸሳኮ ኣኔ ሺቆስ።

23 ኑስ ሂዶታ ቃላ ኢሚዳዴይ ኣማኔቲዛዴ ጊዲዳ ጊሻስ ኑኒ ኣማኒዲ ኢዛ ጊሻስ ማርካቲዛ ሂዶታፔ ያኔ ሃ ጎንታ ኣኔ ሎኤሊ ኦይኮስ።

24 ሲቆኒኔ ሎኦ ኦሶን ኑ ሚኒ ዳና ማላ ኣኔ ኢሶይ ኢሳ ቆፊሶስ።

25 ኣኔ ኑ ኡባ ጋላሰ ኢሶይ ኢሳራ ጋኪ ጋኪ ኢሶይ ኢሳ ሚንፊሶስ ኣቲን ኢሲ ኢሲ ኣሳቲ ሺቆ ኣጊዳ ማላ ኣኔ ኑኒ ሺቆዛ ኣጎኮ፤ ሃራፔካ ጎዳ ዬሱሲ ማታቲዳይሳ ቆፒሼ ካሴፔ ሚኒ ሺቂቲ።

26 ኑኒ ቱማ ሻኪ ኤሪዲ ኤኪዳይሳፊ ጉዬ ኤሪሼ ናጋራ ኦሊኮ ሃይሳፊ ጉዬ ናጋራ ጊሻስ ሺቃናሰ ሃራ ያርሾይ ዴና።

27 ሃራይ ቡሮ ሃናና ዳሮ ባቢሲዛ ፒርዳይ ጸሳ ሞርኬታ ጹጋና ናጊዛ ሚኖ ታማይ ጸላ ዴስ።

28 ሙሴ ዋጋ ካዲዳ ኣሲ ናምኡ ዋይኮ ሄዡ ማርካቲ ማርካቲኮ ማርይ ባይንዳ ሃይቆን ቃጸዬቴስ።

29 ሂሰቲን ጸሳ ና ካዲዳ ኣሲ ኢዛን ጌዱዳ ጫቆ ሱላ ሃራይሶ ሚሻ ማላ ቆዲዳዴሲኔ ኢዛ ኪያቴላ ኣያና ኢሴሊዳዴስ ኣይ ማላ ሄሳፊ ኣዲዛ ፒርዳይ ኢዛሰ ቤሲዛ ኢንቴስ ሚሳቲዬ?

30 «ታኒ ኢዛሰ ሃሎ ኬሳና፤ ኢዛዴ ኦሶ ማላ ኢዛዴሰ ታ ዛራና» ጊዳይሳ ኑ ኤርስ። ቃሴካ፡ «ጎዳይ ባ ዴሬዛ ቦላ ፒርዳና» ጌሰ ጎዳይ።

31 ዴኦ ጸሳ ኩሼን ኩንዴሊ ዳሮ ባቢሴስ።

32 ኢንቴስ ኢሲቶ ፖኦይ ፖኢዳፔ ጉዬ ሜቶ ዋዴ ዳሮ ባጼን ኢንቴ ካሴ ሚኒ ኤቂዳ ቤኒ ዋዴዛ ዩሺ ቆፒቲ።

33 ኢሲ ኢሲ ዋዴ ኢንቴ ዴሬ ዲላታ ሲንላን ጫሻሲኔ ጎዴቴላሰ ኣዲ ኢሜቲዴታ፤ ቃሴ ሃራ ዋዴካ ሄሳ ማላ ዋዬይ ኢስታ ቦላ ጋኪዳ ኣሳታራ ኢንቴካ ኢሲፊ ዋዬ ቤዪዴታ።

34 ኢንቴ ኢንቴስ ሃራፔ ኣዲዛ ሜርናሰ ዳና ሃርይ ዲዛይሳ ኤሪዛ ጊሻስ ቃሼቲዳይታስ ሚሼቲዴታኔ ኢንቴ ሃርይ ቦንቂቲሺን ኡፋይሳን ዳንዳይዴታ።

35 ሄሳ ገሻሰ ገታ ዋጋይ ዲዛ ካሴ አንቴ አማኔቱላ አገፍቱ።
 36 አንቴ ጸሳ ሼኔ ፖሊዲ ኢዚ አንቴሰ አሚዳ ኡፋይሳ ቃላ
 ኤካናሰ ሚኒ ኤቃናሰ አንቴና ኮሼሰ።
 37 ጋሶይካ ጉላ ዋዴፔ ካሊዲ፥ «ያናይሲ ኢዚ ያና፤ ጋሞኤና፤»
 38 ጸሎ አሲ ገዲኮ አማኖን ዴኦ ዴማና፤ ጉዬ ኡንዲዲዛዴይ
 ዲኮ ታ ሼሞፖያ ኢዛዴ ቦላ ኡፋዬቱኩ።
 39 «ኮኒ ገዲኮ አማኒዲ አቲዳይታ ባጋ አቲን ጌዴ ጉዬ
 ኡንዲዲ ዳይዛይታ ባጋ ገዶኮ» ገዴሰ።

11

አማኖ

1 አማኖ ጌሉ ኢሲ ሚሼ ሃናና ገዲ ኑ ሲቶንታ ዲሼ ቤኦንታ
 ሚሼካ ቤኢዳ ማላ ኤሮ ገ ኤኮ።
 2 ካሴ አዋቲ ጋላቲቲዳይ ሄሳ ማላ አማኖና።
 3 ሃይሲ ሃ አላሜይ ጸሳ ቃላን ሜዴቲዳይሳ ኮኒ አማኖን ኤሮሰ፤
 ሄሳሶካ አይፌን ቤቲዛይሲ ሜዴቲዳይ ቤቲዛ ሚሻፌ ገዶንታይሳ
 ኮኒ ኤሮሰ።
 4 አቤሊ ጸሳሰ ቃዬሌ ያርሾፌ አጳዛ ያርሾ አማኖን ሺሺዴሰ፤
 ጸሲ ኢዛ ያርሾዛ ገሻሰ ሃሳይሼ ኢዚ አማኖን ጌሽ ገዲዳይሳ
 ማርካቲዴሰ፤ ኢዚ ሃይቂንካ ኢዛ አማኖይ ሃኢ ጋካናሰ ሃሳዬቱሰ።
 5 ሄኖኬይ ሃይቆ ቤኦንታ ማላ ሃይሳ አላሜዛፔ አማኖን
 ኤኬቲዴሰ፤ ጸሲ ኢዛ ኤኪዳ ገሻሰ ኢዚ ቤቲቤና፤ ኤኬታናፔ
 ካሴቲዲ ኢዚ ጸሳ ኡፋይሲዳይሲ ዮቲቲዳ ገሻሰ ኢዚ
 ኤኬቲዴሰ።
 6 ቃሴካ አማኖይ ባይንዳ ዲሺን ጸሳ ኡፋይሳናሰ ሙሉካ
 ዴንዳዬቲና፤ ጋሶይካ ጸሳኮ ሸቁዛዴይ ዉሪካ ጸሲ ገዛይሳኔ
 ዋዚናፔ ኢዛ ኮይዛይታሰ ኢዚ ዋጋ አማኖይሳ አማናናሰ ቤሴሰ።
 7 ኖሄሰ ጸሲ ቡሮ ኖሄይ ባ አይፌን ቤኦንታ ሚሻ ገሻሰ ናጌታና
 ማላ ዮቲን ኖሄይ ጸሳሰ ባቢዲ ባሶ አሳ አሻናሰ አማኖን ማርካቤ
 ኬዲዲ አላሜ አሳ ፒርዲሲዴሰ፤ አማኖን ቤቲዛ ጸሎቱላ ላቲዛዴ
 ገዲዴሰ።
 8 ኢብራሃሚይ ባሰ ላታ ቢታ ኤካናሰ ጸይጌቲዳ ዋዴ አማኖን
 አዛዜቲዴሰ፤ አዋ ቢዛኮ ኤሮንታ አጌኮካ ኤሮ ገዲ ቢዴሰ።

9 አላጋ ቢታን ቤቱ አሳ ማላ ቡሮ ኔስ አሜታና ጌቲቲዳ ቢታን አማኖን ኡቲደስ፤ ኢዛስ አሜቲዳ ሂዶታ ቃላ ኢዛራ ኢሲፌ ላታና ዪሳቃ ማላኔ ያቆቤ ማላ ዱንካኔን ዳኢደስ።

10 ጋሶይካ ሚና ዲዛሮ ጸሲ ኢዞ ቆፒ ሜዲዳ ካታማዮ ኤካና ናጊደስ።

11 ኢብራሃሜስ ዋዴይ ጌዴ ቢዳዴ ጊዲኮካ ሳራይካ ዬሎንታ ማይኔ ጊዲኮካ ሂዶታ ኢስታስ አሜዳዴይ አማኔቲዳዴ ሂስቲ ጸሊዲ አማኖን ና አዋ ጊዳናስ ጋኪደስ።

12 ሄሳ ጊሻስ ሃይሳ ሃይቂዳ አሳ ማላ ቆደቲዳ ኢሲ ኢብራሃሜፔ ሳሎ ጸሊንቲ ማላኔ አባ አጩ ማላ ቆዳይ ባይንዳ ዳሮ ዜሬላይ ቤቲደስ።

13 ሄይቲ ወሪካ ኢስታስ አሜቲዳ ሂዶታ ቃላ ዴሞንታ ባ አማኖን ናጊዳ ማላ ሃይቂዳ፤ ጊዲኮካ ኢስቲ ሃይሳ ቢታ ቦላ አማፍኔ ቤቱ አስ ጊዲዳይሳ ኤሪዳ ጊሻስ ሃሆን ዲሼ ቤኢዲ ኩሼን አሊዳ ማላ ኡፋይሳን ኤኪዳ።

14 ሄሳ ማላ ጊዛ አሳቲ ኢስታ ዴሬይ አዋኮኔ ባ ዴሬ ናጊዛይሳ ቆንጩን ቤሴቲስ።

15 ኢስቲ ባ ዬጊ ኬዚዳ ዴሬ ዛሪ ቆፒዛኮ ጉዬ ሲሚ ባና ዳንዳዬቲስ።

16 ሃኢ ሄሳፌ አዲዛ ፑዴ ሳሎን ዲዛ ዴሬ ላሞቲቲስ፤ ሄሳ ጊሻስ ጸሲ ኢስታስ ሳሎን ካታማ ጊግሲዳ ጊሻስ፤ «ኢስታ ጸሳ» ጌቲቲ ጸይጌታናስ ዬላቲቤና።

17 ጸሲ ኢብራሃሜይ ባ ናዛ ዪሳቃ ሹካና ማላ ፓጪን ኢብራሃሜይ ዪሳቃ ያርሻናስ አማኖን ሺሺደስ፤ ጸሲ ኢዛስ አማና ጊዳይሳ ኢዚካ ባ ና ኢሲኔዛ ሹካናስ ጊጌቲደስ።

18 ሄሲካ ጸሲ ኢዛስ «ኔ ዜሬሊ ዪሳቃ ባጋራ ጸይጌታና» ጊዳይሳ ማላ።

19 ጸሲ ሃይቂዳዴ ዴንፋናስ ዳንዳይዛይሳ ኢብራሃሜይ አማኒዳ ጊሻስ ዪሳቃካ ሃይቆፔ ዴንዲዳ አሳ ማላ ናሞአንፉ ዴሚደስ።

20 ዪሳቃይ ቡሮፔ ሃናናይሳ ቆፒ ኤኪዲ ያቆቤኔ ኤሳዌ አማኖን አንጂደስ።

21 ያቆቤይ ሃይቃና ጊሻስ ዮሴፌ ናይታ ኢሳ ኢሳ አማኖን አንጂዳይኔ ባ ጉፌ ቦላ ዳርቲ ኤቂዲ ጎይኒዳይ አማኖና።

11:9 ሜዴ 35:27 11:11 ሜዴ 18:11-14፤ 21:2 11:12 ሜዴ 15:5፤ 22:17፤ 32:12 11:13 ሜዴ 23:4፤ 1ታሪ 29:15፤ ማዛ 39:12 11:17 ሜዴ 22:1-14 11:18 ሜዴ 21:12 11:21 ሜዴ 47:31፤ 48:1-20

22 ዮሴፌ ያይቃና ጊሻስ ኢስራኤል አሳይ ጊብጽ፤ ከዛናይሳ ኢዚ ዮቲዳይኔ ባ ሜቄላ ጊሻስ ኢስቲ ኣይ ኦፋናኮ ኢስታ ኣዛዚዳይ አማኖና።

23 ሙሴይ ዬሌቲን ኢዛስ ማላይ ሎኦ ጊዲዳይሳ በኢዲ ኢዛ ዬሊዳይቲ ኢዛ ሄዡ ኣገና ጋካናስ ካዎዛ ኣዛዞ ባቦንታ ቆቲዳይ አማኖና።

24 ሙሴይ ዲጪ ጋኪዲ፥ «ፓሮኔስ ናይ ና» ጌቲታናይሳ አማኖን ኢጲዴስ።

25 ጉላ ዋዴስ ናጋራን በቲዛ ኡፋይሳፌ ኣሉዲ ጸሳ አሳራ ሜቶ በያናስ ዶሪዴስ።

26 ጊብጽ ዴሬን ዲዛ ሃሮፔ ቦላራ ኪርስቶሳ ጊሻስ ዋዬ ኤኮይ ዳሮ ኣጲዛ ሃሮ ጊዲዳይሳ ዩሺ ቆፒዴስ፤ ጋሶይካ ኢዚ ሲንሳፌ ኤካናይሳ ቡሮ ሃሆን በኢዳ ጊሻሳ።

27 ካዎዛ ሃንቆስ ባቦንታ አማኖን ጊብጽ ዬጊ ከዚዴስ፤ ቡሮ በቶንታይሳ በኢዛ ማላ ቆፒዲ ሄ ቆፋን ሚኒ ኤቂዴስ።

28 ባይራታ ኡባ ዋጲዛይሲ ኢስራኤልታ ባይራ ናይታ ዋጲንታ ማላ አማኖን ፓዚጋኔ ሱላ ዉጼላ ዋጋ ዋሊዴስ።

29 ኢስራኤል አሳይ ማላ ቢታ ቦላ ሄሜቲዛ ማላ ዞኦ ኣባ ጊዶራ አማኖን ፒኒዴስ፤ ጊብጽ አሳይ ቃሴ ኢስታሶ ሃናና ጊሼ ኣባን ሚቲቲዴስ።

30 ኢስራኤል አሳይ ኢያርኮ ገምበዛ ላፑን ቃማ ዩዪ ዩዪ ኣጲዳፔ ጉዬ ገምበዛ አማኖን ላሊዴስ።

31 ላይማን ኣቂዛ ኤራኣባ ዴሬ ጸሞሳና ዩዳይታ ሳሮን ሞካ ኤኪዳ ጊሻስ ሃንኮ ኣዛዜቶንታ አሳራ ቆዮንታ አማኖን ኣታዱስ።

32 ሃይሳፌ ኣጼላ ሃራ ኣይ ጋኔ? ጌዶኔ ጊሻስ፥ ባራቄ ጊሻስ፥ ሳሞሶኔ ጊሻስ፥ ዮፍታሄ ጊሻስ፥ ዳዊቲ ጊሻስ፥ ሳሜላ ጊሻስ ቃሴ ናቤታ ጊሻስ ታ ዮቶንታ ማላ ታስ ዋዴይ ዴና።

33 ሄይታንቲ አማኖን ካዎታ ጸኒዳ፤ ሱራ ፒርዳ ፒርዲዳ፤ ባስ አሜቲዳ ሂዶታ ቃላ ኤኪዳ፤ ጋሞታ ዶና ጎርዲዳ፤

34 ታማ ዋልቃ ቶይሲዳ፤ ቃራ ማሻፌ ኬሲ ኤኪ ኣቲዳ፤ ዳቡራፔ ሚኒዳ፤ ኦላሶን ጎባታ ጊዲዳ፤ ኣላጋ አሳ ኦላ ጎዲዳ፤

11:22 ሜጼ 50:24፥25፤ ከሳ 13:19 11:23 ከሳ 2:2፤ 1:22 11:24 ከሳ 2:10-12 11:28 ከሳ 12:21-30 11:29 ከሳ 14:21-31 11:30 ኢያ 6:12-21 11:31 ኢያ 2:1-21፤ 6:21-25 11:32 ዳና 6:11—8:32፤ 4:6—5:31፤ 13:2—16:31፤ 11:1—12:7፤ 1ሳሜ 1:1፤ 1ካዎ 2:11 11:33 ዳኔ 6:1-27 11:34 ዳኔ 3:21-30

35 ማጫሳታስ ሃይቂዳይቲ ፓጺዳ፤ ባጋይቲ ቃሴ ሄሳፌ አጂዛ ሃይቆፔ ዳንሰ ዳማናስ ጊዲ ሃይቆፔ አቴሰ ሌቂዲ ሃይቆስ ባና አሏ ኢሚዳ፤ ዋዬፔ አታናስ ኮዪቤቴና።

36 ኢሲ ኢሲ አሳቲ አሳን ካኤቲዳ፤ ጋራፊቲዳ፤ ባጋይቲ ቃሴ ቃሾ ከሰ ጌሊዳ።

37 ሹቻን ጫዴቲዳ፤ ማጋዜንካ ናምኡ ከዚ ጳልቄቲዳ፤ ማሻን ሹከቲ ሃይቂዳ፤ ጎዴቲሼኔ ዳቡርሼ ዶርሳ ኢቴኔ ዳይሻ ኢቲ ማይኢዲ ዋዬቲዳ።

38 ሃ አላሚይ ኢስታስ ቤሶንታይሳ ጊዲዳ ጊሻስ ባዞኒኔ ጌዜን ጎንጎሎኒኔ አላ ጊዶን ዋዬቲዳ።

39 ሄይታንታ ኡባታ አማኖ ጊሻስ ማርካቲኮካ ኢስታፌ ኦኒካ አሚታና ጌቲቲዳ ሂዶታ ቃላ ጋኪ ኤኪዳዴይ ዳና።

40 ጸሲ ኑስ ሄሳፌ አጂዛዝ ጊግሲዳ ጊሻስ ኑ ባይንዳ ኢስቲ ጸላ ኩሜሰ ጊዳና ዳንዳይቤቴና።

12

ጸሲ ባ ናይታ ሴሬስ

1 ሄሳ ጊሻስ ሻራ ማላ ኑና ዩዩ አጂዳ ዳሮ ማርካቲ ኑስ ዲሺን ኑና ዴጺዛ ቶሆኔ ቃሴ ኑና ቃቺ ኦይኪዛ ናጋራ ወርሲ ኑፔ ዋራ ዩጌዲ ኑ ሲንላን ዲዛ ዋሳ ጌንጫኒኔ ዳንዳያን አኔ ዋጸስ።

2 ኑ አማኒዛ አማኖዛስ ኮይሮኔ ፖሎ ጊዲዳ ዩሱሳ አኔ ጴሎስ፤ ኢዚ ባ ሲንላን ዲዛ ኡፋይሳ ጊሻስ ማስቃሌ ቦላ ሃይቆ ዳንዳይዲ ማስቃሌ ቦላ ባና ጋካና ካዉሻቲላ ሌቂዲ ጸሳ አልጋስ ኡሻቻን ኡቲዴስ።

3 ሂስቲኮ ኢንቲ ዳቡርዲ ሂዶታ ቃንጸንታ ማላ ሄሳሶካ ናጋራንቻታፔ ካሴ ኢዛ ቦላ ጋኪዳ ሄሳ ማላ ኤቄቴሰ ዳንዳይዳ ዩሱሳ ቆፒቲ።

4 ሱሊ ጉካና ጋካናስ ናጋራራ ኢንቲ ቡሮ ኤቄቲቤኬታ።

5 ኢንቲ ጸሳ ናይታ ጊዲ ኡቲዲ ቃላይ ጊዛይሳ ባሊዴታ፤ «ታ ናዞ ጸሳ ሴራ ካዉሻን ጴሎፋ፤ ኔና ኢዚ ሴሪዛ ዋዴ ሂዶታ ቃንጸፋ።

6 ጋሶይካ ጎዳይ ባ ዶሲዛዴ ሃንቄስ፤ ኢዚ ባ ዶሲዛዴ ሴሬስ፤ ኢዚ ባ ና ማላ ጴሊዛዴ ቃጸዬስ» ጊዴስ።

7 ጸሲ እንቴና ባ ና ማላ ቆዲዛ ገሻሰ ሃንቆ ዳንዳይቴ፤ አዋይ ሃንቆንታ ናይ ኦኔ?

8 ናይ ወሪ ሴራን ዲጪዛ ማላ እንቴ ዲጮንታ አገኮ እንቴ ካሪን ዩሌቲዳ ና ኦቲን ሶ ና ጊዴኬታ።

9 ሄሳ ኡባፌ ቦላራ ሃይሳ ቢታ ቦላ ኑና ሃንቂ ዲቺዳ አሾ አዋቲ ዳቴሰ፤ ኑኒካ ኢሰታ ቦንቸሰ፤ ሂሰቲን ዳኑን ዴያናሰ ኑሰ አያና አዋ ጊዲዳይሳሰ አዛሰ ሄሳፌ አሊ አዛዜቶኮኒ?

10 ኑ አዋቲ ኑና ባሰ ሎኑ ሚሳቲ ቤቲዳ ማላ ጉላ ዋዴሰ ቃጸዬቴሰ፤ ጸሲ ጊዲኮ ኑኒ ኢዛ ጌሻቴላ ኢዛፔ ዴማና ማላ ኑና ጎኣናሰ ቃጸዬሰ።

11 ቂጻቴይ ወሪካ ሃኢሰ ኡፋይሶንታ ኢታ ሚሳቴሰ ሺን ጉዬፔ ቃሴ ዶሲ ኤኪዳ አሳታሰ ሳሮቴሊ ኢዛን ኩሚዳ ጸሎቴላ አይፌን ገሏሰ።

12 ሄሳ ገሻሰ ዳቡርዳ እንቴ ቄሴኔ እንቴ ጉልባቴ ሚንሊቴ።

13 ዋቤይ ፓጻና ማላ ኦቲን ካሴፔ አሊ ዋቦንታ ማላ እንቴ ቶሆሰ ሎኑ ኦጌ ገግሲቴ።

ጸሳሰ አዛዜቶንታዴሰ አሜቲዳ አዛዞ

14 አሲ ኡባራ ሳሮ ዳና ማላ እንቴሰ ዳንዳይቲዛይሳ ኡባ ኦሊቴ፤ ጌያና ማላ ኮዪቴ፤ ጌሻቴሊ ባይንዳ ጎዳ ቤያናሰ ዳንዳይቴና።

15 እንቴፌ ኢሳዴሰካ ጸሳ ኪያቴሊ ፓጮንታ ማላ ቃሴካ ጫዋ አይፌ አይፊዛ ሚሊ ዋኪዲ ሜቶ ሜጶንታ ማላኔ ዳርታ ሞሮንታ ማላ ናጌቲቴ።

16 ኢሲቶ ማና ካሳሰ ባ ባይራቴላ ባይዚዳ ኤሳዌ ማላ እንቴፌ ኦኒካ ላይማቲዛዴ ዋይኮ ጸሰ ቦንቸንታዴ ጊዲ ቤቶንታ ማላ ናጌቲቴ።

17 ኤሳዌይ ጉዬፔ ካሴ ባ አንጃዛ ላታናሰ ዛሪ ኮዪን ኢዛሰ አሜቶንታ ዲጌቲዳይሳ እንቴ ኤሬታ፤ ኢዚ ባና ጋኪዛ አንጃዛሰካ ዳር ዩኪሼ ኮዪዲካ ዛሪ ዴማናሰ ዳንዳይቤና። *

18 ኩሼን ቦቺኮ ቦሼቲዛ ታማይ ኢዛ ቦላ ኤጺዛ ሲና ዙማኮ፤ ሄ ቋማኮ፤ ሄ ቱላላዛኮኔ ሄ ጎቲ ጫርኮዛኮ እንቴ ጋኪቤኬታ።

19 እንቴ ዛዬ ገሪሳኮ ዋይኮ ሃይሳን ሲዬቲዛ ቃላ ገሪሳኮ ጋኪቤኬታ፤ ሄሳ ሲዪዳ አሳቲካ ሃራ ቃላ ጉጃንታ ማላ ዋሲዳ።

12:12 አሳ 3:3

12:13 ለሚ 4:26

12:15 ዛሪ 29:18

12:16 ሜዴ

25:29-34

*

12:17 ዴማናሰ ዳንዳይቤና፤ ዴማናሰ ዳንዳይቤና ጊዛይሳ ማሬታናሰ

አይኮ ቃዳ ዴሚቤና ጋና ዳንዳይቴሰ።

12:17 ሜዴ 27:30-40

20 ሄሳስ ጋሶይካ፡ «ሃራይ አቶሺን ማሄይካ ዙማ ቦቹዛ ገዲኮ ሹቻን ጫዳቲ ሃይቆ» ገዛ አዛዘዛ አሳይ ናጋናሰ ዳንዳይቤና።

21 ሄ ዋዴ ሄን ሃኒዛይሲ ወሪካ ዳሮ ባቢሲዛይሳ ገዲዳ ገሻሰ ሙሴይካ፡ «ታ ባባዳ ኮኮራዲስ» ገዴስ።

22 አንቴ ቃሴ ሃ ጸዮኔ ዙማ ቦላ፡ ፑዴ ሳሎ ዬሩሳላሜ፡ ዴኦ ጸሳ ካታማ ኡፋይሳን ሸቂዳ ቆዳይ ባይንዳ ኪታንቻታኮ ዪዴታ።

23 ኢስታ ሱንፊ ሳሎን ጸፊቲዳ ባይራታ ማባራንኮ፤ ኡባሰ ዳና ገዲዳ ጸሳኮ ኢስታ ቦላ ዋሶይ ባይንዳ ጸሎ አሳታ ሸምፖይ ዲዛሶ ማቲዴታ።

24 ኦራሳ ጫቆን ማቃዪንፊዛይ ዬሱሳኮ፤ ሄሳሶካ አቤሊ ሺሺዳ ሱሳፊ አጂዛ ጫቆ ቃላ ዮቲዛ አራጨቲዳ ሱሳኮ ጋኪዴታ።

25 አንቴሰ ዮቲዛይሳ አንቴ አካይ ጎንታ ማላ ናጌቲቲ፤ ሄይታንጌ ጸሲ ቢታ ቦላ ዲዛ አሳ ባጋራ ኢስታሰ ዮቲዛይሳ ኤኮንታ ኢጲዲ ኢዛፔ አታናሰ ዳንዳዮንታ ኣጊኮ ኑኒ ሳሎፔ ዪዳይሲ ኑሰ ዮቲሺን ኤኮንታ ኢጲኮ ኑ ኢዛፔ ዋኒ አታኔ?

26 ሄ ዋዴ ቃላ ገሪሳን ቢታ ቃሊዴስ፤ «ሃኢ ቃሴ ቢታ ጸላ ገደንታ ታኒ ሳሎካ ቃሴካ ታ ዛራዳ ኢሲቶ ቃላና» ገዛ ቃላ ዮቲ ዋሊዴስ።

27 ሃይሲ፡ «ቃሴካ ታ ዛራዳ ኢሲቶ» ገዛ ቃላይ ኑና ቤሲዛይ ቃጸንታይቲ ሚኒ ዳና ማላኔ ቃጸዛይቲ ሄይቲካ ሜዴቲዳይቲ ኪቻናይሳ ቤሴስ።

28 ሄሳ ገሻሰ ኑኒ ሙሌካ ቃጸንታ ካዋቴሰ ላታና ገሻሰ አኔ ጸሰ ጋላቶስ፤ ቃሴካ ኢዛ ኡፋይሲዛ ኦጌራ ቦንቸሲኔ ያሻቴላን አኔ ኢዛሰ ጎይኖስ።

29 ኑ ጸሳይ ጸጊዛ ታማ ማላ።

13

ወርሴሳ ዞሪ

1 አንቴ አንቴ ገደን አሻታ ማላ ዶሴቲቲ።

2 ኢማላ ሞኮ ባሎፒቲ፤ ኢሲ ኢሲ አሳቲ ሄሳሶ ኦሊሼ ኤርንታ ኪታንቻታ ኢማላቴሰ ሞኪ ኤኪዳ።

3 ቃሾ ኬላን ዲዛይታራ አንቴካ ቃሼቲዳ ማላ ኢስታሰ ቆፒቲ፤ ሄሳሶካ አሳ ኩሼን ዋዬቲዛይታራ አንቴካ ዋዬቲዛ ማላ ኢስታሰ ቆፒቲ።

4 ኤኮይ ጌሎይ ኡባ አሳ አቻን ቦንቹቶ፤ ኢንቴ ሂሊ ጌሽ ጊዶ፤ ጋሶይካ ላይማ አሞይ ዲዛይታ ቦላኔ ላይማቴዛይታ ቦላ ጸሲ ፒርዳና።

5 ሚሻ ሲቆፔ ናጌቲቴ፤ ኢንቴሰ ዲዛይሲ ጊዳና፤ ሄሳሰ ጋሶይካ ጸሲ፡ «ታ ኢንቴና ሙሌካ ኣጊኬኔ ዩጊኬ» ጊዳሰ።

6 ሄሳ ጊሻሰ ኩሜላ ዋዚናፔ ኑኒ፡ «ጎዳይ ታሰ ማዶ፤ ታ ባቢኬ፤ ታና ኣሲ ኣይ ኦላና ዳንዳይዜ?» ጎሰ።

7 ኢንቴሰ ጸሳ ቃላ ኮይሮፔ ዮቲ ካሌሊዛይታ ባሎፒቴ፤ ኢሰታ ዱሳን ቤቲዛ ሎኦ ኣይፌይ ዲዛይሳ ዩሺ ቆፒቴ፤ ኢንቴካ አማኖን ኢሰታ ሚሳቲቴ።

8 ዩሱሰ ኪርሰቶሲ ሃቺካ ዋንቶካ ሜርናሰካ ኢዚ ኢዛኮ!

9 ዱማ ዱማ ኢማላ ቲሚርቴ ኤኮፍቴ፤ ኑ ዋዚናይ ሚኒ ኤቂዛይ ጸሳ ኪያቴላን አቲን ካላ ዋጋ ናጎን ጊዳና፤ ሄ ዋጋ ናጊዛይቲካ ኢዛን ጎኤቲቤቴና።

10 ኦሰ ያርሾሶይ ዳሰ፤ ጊዲኮካ ዱንካኔዛ ጊዶን ኦሊዛ ቄሴቲ ሄ ያርሾሶዛ ቦላ ዲዛ ካላፌ ኤኪ ሞንታ ማላ ዲጌቲዳ።

11 ቄሴታ ሃላቃይ ናጋራ ቲቂዛ ሜሄ ሱሐ ኤኪዲ ኡባፌ ዱማ ጌቴቲዛ ኪፊሌ ጌሌሰ፤ ሜሄታ አሾይ ጊዲኮ ካታማፔ ካሬን ጽጌቴሰ።

12 ሄሳሶካ ዩሱሲ ባ ሱላ ባጋራ አሳ ጌሻናሰ ካታማ ፔንጌፌ ካሬን ሜቶ ቤዪዳሰ።

13 ሄሳ ጊሻሰ ኑኒካ ኢዚ ቶኪዲ ካዉሻቴላ ቶኪዲ ኑ ዲዛሶፔ ጌዳ ኢዛኮ ካሬ ኣኔ ኬዞሰ።

14 ጋሶይካ ሃይሳን ኤቂ ዳና ካታማይ ኑሰ ዳና፤ ጊዶ አቲን ቡሮ ሲንላፌ ያና ካታማዮ ናጎሰ።

15 ሄሳ ጊሻሰ ኡባ ዋዳ ጋላታ ያርሾ ሄሲካ ኢዛ ሱንላሰ ማርካቲዛ ኑ ዶናፔ ቤቲዛ ኣይፌ ጊዲዳዝ ዩሱሳ ባጋራ ጸሳሰ ኣኔ ሺሾሰ።

16 ቃሴካ ሎኦ ኦሶኔ ኢንቴሰ ዲዛይሳፌ ሃራታሰ ኢሞ ባሎፒቴ፤ ጸሲ ሄይታንታ ማላ ያርሾን ኡፋዬቴሰ።

17 ኢንቴና ካሌሊዛይታሰ ኣዛዜቲቴኔ ሃሬቲቴ፤ ሄሳሰ ጋሶይካ ኢንቴ ጊሻሰ ኢሰታ ኣላፌቴላን ዳሮ ኦይቺዛ ጉዳይ ዲዛ ጊሻሰ ኢንቴ ሺሞፖ ጊሻሰ ዳሮ ባጾቴቴሰ፤ ሄሳ ጊሻሰ ኢሰቲ ባ ኦሊዛ ኦሶዛ ላንጨቴሺ ጊዶንታ ኡፋይሳን ኦላና ማላ ኢንቴ ኢሰታሰ ኣዛዜቲቴ። ኢንቴ ሄሳሶ ሂሰቶንታ ኣጊኮ ኢንቴሰ ሎኤና።

18 ኑስካ ወሲቲ፤ ኡባሶራካ ሎኦ ዱሰ ዳናሰ ላሞቲዛ ሎኦ ቆፋይ ኑስ ዲዛይሳ ኑ ሲታኮ።

19 ሃራፔካ ታ ኢንቴኮ ኤሌን ሲማ ባና ማላ ታስ ኢንቴ ዋሳና ማላ ሃዳራ ጋይሰ።

20 ዶርሳታ ሄንፋንቻይ ዋጋ ጎዳ ዬሱሰ ኪርሰቶሳ ባ ሜርና ጫቆ ቃላ ሱፋን ኢዛ ሃይቆፔ ዴንፊዳ ሳሮቴፋ ጸሲ።

21 ኢንቴ ኢዛ ሼኔ ፖላና ማላ ሎኤቴፋን ኢንቴና ጊጺሶ፤ ጸሳ ኡፋይሲዛይሳ ዬሱሰ ኪርሰቶሳ ባጋራ ኑናን ኦፋ፤ ኢዛሰ ሜርናፔ ሜርናሰ ቦንቾይ ጊዶ። አሚን።

22 ታ አሻቶ! ኢንቴሰ ጸፊዳ ዞሬ ቃላይ ጉል ጊዲዳ ጊሻሰ ኢንቴ ሃንቄቶንታ ማላ ታ ኢንቴና ሃዳራ ጋይሰ።

23 ኑ አሻ ጸምቶሲ ቢርሼቲዳይሳ ኢንቴ ኤራና ማላ ታ ኮያይሰ፤ ኢዚ ኤሶን ታኮ ዪኮ ታ ኢዛራ ሄ ባዳ ኢንቴና ሄን ቤያና።

24 ኢንቴና ካሌፊዛይታ ኡባታሲኔ አማኒዛ አሳ ኡባሰ ታ ሳሮካ ዮቲቴ። ኢጸሊያን ዲዛ አማኒዛ አሳይካ ኢንቴና ሳሮ ጌሰ።

25 ጸሳ ኪያቴፊ ኢንቴናራ ጊዶ። አሚን።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b